

篷

窗

隨

錄

蓬窗隨錄卷九

天津沈兆澧雲巢甫輯

男維璫校

目錄

議

李克論將相議

俞長城

張說證魏元忠議

俞長城

畿輔水利私議

吳邦慶

京東水利議

陳黃中

預備倉貸穀私議

劉汶

堅壁清野議

龔景瀚

附擬諭官紳士民告示

龔景瀚

平賊議

龔景瀚

李克論將相議

天下有施于用則效揆之理則非者不可不察也魏文侯謀相于李克克對以所親所與所舉不爲不取之說當矣然魏成不足以稱之克曰成食祿千鍾不肯在外故得卜子夏等以爲師翟璜不若也夫其人果賢邪不爲祿來果不賢耶雖來何益燕丹黃歇致士不下數千人而卒不救于亂亡豈在致客之多少耶吾觀魏國之賢莫若子夏學聖人之學道王者之道克不請以子夏爲相而欲相舉子夏之人是高帝之相不在蕭何而在鄧千秋文帝之相不在陳平而在魏無知也古之所謂師與相者未嘗分而二之也湯于伊尹學而後臣武于

太公父而兼傅師也者所以尊其道也相也者所以重其權今以虛名待賢者而以國事委庸臣尊賢任臣兩失之鮑叔薦管仲曰治于高侯使相可武侯薦龐統請爲治中梁公薦張柬之請爲宰相夫好賢者未有以名致之而以貌拘之者也成徒知致子夏而不知薦子夏克從而和之其得爲知相體者乎雖然克之失非特此也他日謂文侯曰吳起貪而好色然用兵司馬穰苴不過也夫禮義者戰之具也義則不貪禮則不淫貪且淫則士不飭民不安其何以將起之用兵詐力焉耳詐勝愚力勝怯遇大智大勇則殲焉項羽之力而死于垓下曹操之詐而潰于赤壁使起遇桓文之師其能無敗乎

故吾以克薦魏成爲不知相其薦吳起爲不知將

張說證魏元忠議

俞長城

逆惡甚死而忠美過生含冤而歿忍垢而存存之樂不如歿之樂也不虞而譽求全而毀譽之榮不如毀之榮也魏元忠破李敬業折張昌宗其所長也唐臣仕周其所短也是元忠所長者細行所短者大節也昌宗怨之誣其欲挾太子反是將誣之爲罪案實加之以美名也爲元忠計爲愛元忠者計與其辨而生生而逆孰若伏而死死而忠乃昌宗將置之于死元忠苟全其生則是人強加以忠而已自居于逆也張說將誣其有宋璟劉知幾勸之辨其無則是惡之者欲其忠而死而愛之者欲其逆而生也人知反爲逆不知反爲忠人知不反而

生生而樂不知反而死死而榮魏元忠過矣張說過矣  
宋璟過矣劉知幾過矣元忠何過仕武氏過挾太子非  
過張說何過黨張氏過證元忠非過宋璟何過救元忠  
之死而敗元忠之名劉知幾何過以誣爲非不以反爲  
正故曰是非不明取舍違逆順不辨賢否混



畿輔水利私議

吳邦慶

歷觀往牒談西北水利者衆矣大抵謂

神京重地不可盡仰食於東南或謂冀北膏腴不可委地利於曠棄而考其建置施設則未有指明入手究極成功坐而言即可起而行者我朝雍正時因水災後上厯

宸衷命怡賢親王徧歷郡邑酌定章程羣吏奉行已有成效迺施功未竟日久漸湮迄今僅及百年故蹟已多無考今

聖天子軫念民依思爲億兆謀樂利之休而續

世宗憲皇帝之謨烈邦慶適以修理松楸往來田間諮

詢父老因著私議一首用備芻蕘之

獻託於問答以暢其說亦明徐尙寶貞明潞水客  
談之意也或問講

畿輔水利於今日爲創乎爲因乎答曰此因也非  
創也然往迹已陳必善因之乃可得其頭緒則  
請設爲清核定議估計派修四說清核若何曰  
直省有水田之州縣載在通志者凡三十七皆  
係遣官分治報存冊籍者其他天然水利無煩  
營治如宣化之蔚州保安正定之靈壽趙州之  
甯晉隆平尙不在此數也今如檄行各處使自  
具報則州縣委之吏胥委之地保顧預從事依

樣葫蘆何從得其實數哉今擬將舊有水田州縣輿地計里各繪一圖按照管田水利府舊冊載通註明某縣有某河某泉某處引用成水田若干頃畝今某水猶經由某處否某泉猶暢旺否所建閘壩所開涵洞渠口尙照舊否或雖殘缺尙有遺址否統計水田確有若干按圖填寫呈報再行遣員持圖往查其查勘務須會同縣佐貳及學官蓋佐貳事簡且多兼水利學官與本地士子較親切河道水泉之故蹟父老不能詳而老生耆宿多知之可藉以詳確查問查竣稟報再核對州縣所申之圖冊是者依之訛者

改之其草率應命者申飭之到齊彙爲總冊則水田坐落處所及頃畝實數或昔有今無瞭然於心目矣實數旣核然後水道可得而議也水之屬爲泉爲河爲引淀泊之流爲蓄近海之潮泉源宜疏畦以引之經流宜開渠設涵洞以析之形勢就下宜建閘以蓄之來源太猛宜修陂以緩之他如水潦易及之處則宜爲圍爲圩山麓犖确之地則宜布石留泥超壑越澗之處則宜騰橋筒車水性不外此數則用法亦不外此數種然相度地勢酌量施用非胸有見地又虛衷採詢則不能辦也其要在委員與鄉耆並用

傍水之地老年土人於每年水勢旺弱與其力之所及閱歷既久知之必悉然鄉里之人多止爲一隅起見或地居上游則不顧下游或欲專其利則不顧同井須與委員參用偕同訪求詳爲議論某所宜建閘以蓄水某處宜開渠以分流某處宜設涵洞以分其潤某處宜濬陂澤以防其猛某處宜築塘以備旱某處宜設圍以成田合水力之所至通盤籌畫然後以其議詳之大府而待裁定並張之通衢如有異議者許其在委員處具呈反覆詳求務期有利無弊衆議僉同庶百姓皆樂於圖始議定再行遴委諳練

工程之員逐一踏勘有應開之河則計深廣丈尺上下里數共土方若干每方計費銀若干開壩涵洞每座應用灰石工費若干計用銀若干他如建園開塘挑挖淤塞應用夫工若干每工應需錢米若干並占用旗民地畝若干統行開明彙報總其成者再行細核審無浮冒然後彙成總冊則應開之工若干應用之項若干始有成算估計既定成數在胸若盡需支領於官則國家經費有常未敢妄議若責辦閭閻則百姓力恐未逮計惟有將工程費用多寡定爲等次其工之鉅者需項雖多利濟必遠則借領官項興

修核計獲利地畝帶徵還欸其次或本地殷實之戶或各處急公好義之人有能捐貲辦理認修工段者係職官則

奏請議叙係民人則酌加獎勵至零星有工無料之工則酌派用水各村莊同力合作尅期厥功如此則合衆力以成美利而不致糜費

國帑蓋核計明則水道原委頃畝坐落清矣定議審則宜闢宜渠宜分宜合確矣詳於估計則銷算不至虛冒按等派修則輕重咸得其宜上下同心其成功可屈指而計也至占用旗民之地或照時價購買或以官地抵補或將附近地畝

抽補如開河占地一頃灌溉所及之地十頃則此十頃皆以九畝爲十畝而占去之地亦得九十畝矣而地畝被占之家亦不至稍有偏

枯又有佃種官地旗地者近京五百里內有之亦宜官

爲立案修成水利之後其租價一照現在旱田之數永不加增則佃戶更爲踴躍而且地成之後但資灌溉之利不必定種杭稻察其土之所宜黍稷麻麥聽從其便又開渠則設渠長建閘則設閘夫閘頭嚴立水則以杜爭端設立專職以時巡行牧令中有能勤於勸導水田增閘者卽登薦剡以示鼓勵則區畫周詳纖微必到庶村氓野老咸知



聖天子賢有司殫心竭力皆爲草茅廣積儲之原焉  
有觀望遲回裹足不前者哉然必司事者職有  
專轄而權無旁撓而又集思廣益不執己見然  
後能搜訪人材委之職事以竟其功敬閱雍正  
四年設立水利營田府事案怡賢親王總其成  
大學士朱軾爲之輔又有營田觀察使有副使  
又有効力革職員外郎秦嶠等諸人其不載見  
於冊籍而効奔走供指使者尙不知凡幾也又  
雍正四年戶部議准大學士朱軾條奏營田事  
例四款一自營己田者照田畝多寡給與九品  
以上五品以下頂帶以示優旌一効力營田者

應酌量工程難易頃畝多寡分別錄用一罣誤  
降調革職之員効力營田者准其開復一流徒  
以上人犯効力營田者准減等是其時搜羅人  
材伙助經費之道極爲詳備故能三四年間營  
治水田七千餘頃功雖未竟而今猶可按成規  
收事半功倍之效較創始者其省力蓋萬萬也  
邦慶旣編輯怡賢親王疏鈔陳學士儀河渠志  
及水利輯覽營田圖說諸冊以備觀覽而又爲  
私議以附於後觀成有日不勝額手以俟云

京東水利議

陳黃中

論治水於東南常利多而害少論治水於西北則利少而害多何者東南之水大爲江湖小而陂澤或以濟輓輸或以資灌溉有一水卽有一水之用雖或有泛溢其爲害常淺至西北之地旱則赤野千里潦則萬頃洪流上游諸水迅駛而多泥橫流潰決遷徙不常在畿輔爲尤甚此豈水害獨重於西北歟夫亦未明其去害之要故祇見其害而未收其利也夫畿輔水患無如蘆溝漳沱二河蓋其源遠流長發源天池溢爲桑乾順流東下千有餘里會大同宣府保定雁門應州雲中諸水穿西山入蘆溝橋是爲渾河亦名蘆溝河東南至看舟口又

分爲二一由通州之高麗莊入白河一南注霸州合易水注直沾入海其上流在西山之陰水勢束於山峽故流湍而無害其下流在西山之陽則地平土疏隨時漫溢康熙三十七年以連歲水患頻仍

聖祖仁皇帝特命大臣相度自良鄉至東安開渠築隄束水歸淀入海 賜名永定此永定河名所自起也

自開築以後迄今四十餘年歲糜帑金以十萬計而夏秋之際淫潦間作決隄妨稼者歲常不免順天真定河間半爲沮洳橫激壅淤淀河俱被其害近者臣工建議以永定河下口壅淤應改移固安城南霸州城北以順東趨之勢由津水窪接東淀達西沾入海將西引河壑

閉而引河兩岸不設隄防任水漫溢則勢散而不爲害  
低田可收肥淤之利以爲此實不治而治之上策然余  
竊以爲猶有未盡也夫治水之利害與墾田相爲表裏  
自古及今未有聽水泛濫而田不爲所害者故水之爲  
物非享其利卽受其害誠使水性就治則瘠土可化爲  
膏腴不治則沃壤亦鞠爲萑葦利害懸絕正未可以不  
治爲上策也故竊以爲今日治北河之法有三其一濬  
下流以決其壅自三角淀以東廣加濬導使沿流而下  
略無阻滯則衝決之害可息其一則借淀以刷其流渾  
河挾泥濁流故元史有小黃河之名如于雄新諸淀要  
害之處觀度形勢旁通曲引藉清水之力刷濁流之滯

則東趨入海當益暢流其一則廣開支河以殺其勢水趨一壑則河形隘而溢流旁引支河則水勢分而力弱使於固安新城雄霸之間隨地高下因勢利導多開小河使漲水之來有所停蓄自無決蕩田廬之患行此三者而永定之害可除害除則利可興矣夫直隸之水經流有三北爲白河南則衛河合二河入海者爲淀河淀之南則子牙北卽永定京南則滹沱實爲大澤綿亘千餘里今則時決時淤不甚爲害惟子牙爲滹漳滏陽大陸諸水下流水濁沱多人淀每多壅滯至各淀自清苑以下文安以上今雖建閘設壩然欽隄漸圯玉帶諸河之水往往侵囓隄址若苑家河之逼窄莽牛河之溢漫

固安霸州諸邑並患之雄縣趙北口實爲西淀咽喉而  
潞龍河柴淀口每多潰決爲行旅之患漕糧二河直逼  
新安雖築護隄其勢終可慮也今誠于築隄設壩之外  
更于上游十五河疏濬溝渠引以灌田以殺水勢下流  
復多開陂池以蓄橫流淀之最下者留以潞水稍高者  
仿南人築圩而田之募南人給以衣食農具使以一教  
十俟墾有成績各給以世業二頃准作土著其址地之  
無力者假以牛種俟秋收後還官旱潦則免相度地勢  
擇其便宜則易水可以溉京畿滹水可以溉眞定滹水  
可以溉定州滏水可以溉順德漳水自鄴而下西門豹  
史起常用之矣河間當下流之衝與江南澤國無異京

東永平灤州抵滄州慶雲地皆膏壤元虞集京東水利之議行則北起遼海南濱青齊皆良田也其他山下之泉地中之水所在而有誠使水無餘利行之十年歲可得穀千萬石而山東山西陝西亦皆可次第及之使西北之水利旣成則東南之漕粟可減且使西北倉庾豐盈而東南七省之漕各留本省則水旱不足爲害此萬世之利也或謂向者營田水利未收其效種植之產南北異宜此則未明治水之要者也夫將有所取必先有所棄故欲興水利于西北當先規度地勢棄最下之田蠲其常稅漕爲陂澤而田間廣開溝洫使貫注陂渠則潦有所洩旱有所資第使每邑蠲去若干頃而其餘所



墾之地凶歲俱可無虞是一時所蠲之數甚少而久遠之利無涯且畿甸水旱頻聞蠲免動以數十萬計是與其施蠲于被災之後歲歲無窮曷若預免于興利之先公私永賴至去水稍遠之地其土性所宜植者自當聽之于民則地力自無不盡是治水卽以治田除害卽能興利正未可諉爲水不必治而聽其害之無所底止也如必窪下之地利其肥淤寸寸而耕之水旣無所歸則漫溢旁流高原並受其害是得肥淤之利少而受泛溢之害多此尤不可之甚者至遠水之區亦強令種稻此前者營田之所以無功豈可吹羹而懲蠶田噎以廢食哉而其要尤在得人而任之耳

預備倉貸穀私議

劉汝

康熙庚午山東巡撫佛倫請積穀備荒畝征四合別儲於倉

上下其法於各直省癸酉巡撫桑格上言倉穀已足請停四合之征於是天下州縣皆有積穀矣謂之預備倉辛巳御史李發甲疏請開倉貸民春放秋收二分取息如朱子社倉之法方今

聖人在上耆德盈庭嘉謀讜論豈小儒輒能窺測抑民生利病亦

聖世甄陶之士所宜究心嘗讀朱子學校貢舉私議謹依倣斯體擬作一通聊當格物質之師友云爾

謹按朱子社倉卽王安石青苗之法然而青苗害民社倉便民何也青苗以錢貸民而收二分之息錢社倉以穀貸民而收二分之息穀錢與穀不同也青苗錢必貸於縣社倉穀則貸於鄉縣與鄉不同也青苗之出納官吏掌之社倉之出納鄉人士君子掌之官吏之與鄉人士君子不同也青苗意主於富國故歲雖不歉民雖不急亦必強之而貸取其息社倉意主於救荒故必儉歲貧民願貸而後與之強貸與願貸不同也青苗雖帑藏充溢猶收息錢社倉始惟借府穀六百石至十四年後還六百石外尙餘三千餘石足以備荒遂不復取息但每石加耗米三升而已取息與耗米不同也此利害

之所由分歟頃者臺奏請以預備倉穀貸民春放秋收  
二分取息如朱子社倉之法竊以爲臺臣所奏乃朱子  
始立社倉不得已之權宜非十四年以後經久之良法  
也又預備倉之制與社倉微有不同誠如臺臣所請其  
細碎不便於民者不勝臚列姑言其弊最大者有五焉  
社倉穀積於本鄉近者比屋遠者數里負戴甚易耳今  
之倉穀在縣不在鄉遠鄉貧民無舟車引重之具勢不  
能匍匐數十百里而求升斗之穀若欲移穀於四鄉大  
鎮以便民則儲蓄無地輓運無資然則其能貸穀者不  
過城中關外游食之子無籍之徒耳本圖賑業農民究  
竟農民一無所得其弊一也社倉乃鄉黨之私事可以

鄉人賑之今則公家之事出納之際必藉吏胥其放穀也朽腐糠粃迫脅領取愚民不敢不受其收穀也淋尖踢斛名爲加二其實則加倍又加四矣其間期程迫促符檄追呼公人酒食之具出入賄賂之需道路往來之費旅宿守候之累必不能免民將重因其弊二也歲之豐儉不常則貸穀多少每歲不等若定例每年春放秋收歲終總核其加二之入則縣令視爲定額不敢缺少以妨考成非按里抑配卽按畝濫征抑配則不借者亦必強之借矣濫征則不得穀者亦必還穀矣陝西籽粒一案不肖官吏以此二法殃民向所目擊心痛者今又將徧殃各直省矣其弊三也社倉之法原因借官穀作

本勢須還倉又六百石之穀不足爲荒備故不得已而取加二之息及至官穀已償積穀已足遂不加息但取耗米三升假令朱子早得三千石穀必不加息矣豈待十四年後乎今預備倉穀大縣數千石小縣亦不下千石八百石略足支一縣之飢可以不取息矣若仍依死法不知變通窮民既有償息之苦倉庾又有穀滿之虞蓋藏織席費出何所取辦民間又須生事且五年之後穀備倍於今穀多農少借者益稀而有司仍責每年加二之額其勢不得不出於抑配不得不出於濫征本以救民反以害民其弊四也各縣倉穀那移者多實儲者少朽蠹者多完好者少縣令正苦虧空無術補苴忽得

此例必以朽蠹與民或實無倉穀造爲領狀以欺上官上官或受其賕而陰爲之庇則縣令益無顧忌公然按里按畝均派還倉此亦陝西籽粒已然之弊必復現於倉穀其弊五也五弊並興則是募社倉之名而得青苗之實也甚非計也然則爲今之計宜何從曰亦惟行朱子十四年以後之社倉耳然且不能悉除五弊僅可免其三焉蓋立法防弊十得其七已爲良法其十之三則待人而後行非法所能及也所謂三弊可免者一曰貸穀與民並不取息但收耗米每石三升如朱子之法則弊少十之三矣二曰貸穀多少以豐凶爲酌量歲終造冊詳報不預限其數則弊又少十之二矣三曰先查倉

穀實儲若干朽腐若干虧空若干據實首明免其前愆責令停陞停俸陸續補完準與開復若以朽穀與民或僞寫領狀私派出里立即革職拏問從重治罪督撫司道徇庇不卽揭參或被科道糾彈或被旁人告發并治督撫司道知府之罪如此則弊又少十之二矣此法定設有賢能督撫仰體

皇上加惠元元至意任使循良各以其忠厚惻怛之誠爲長久深遠之計盈縮之數因地制宜斂散有方因人授事勿中飽於蠹胥勿漏卮於游手勿任法而苛急勿慢令而後時庶幾彼二弊者亦以漸去而水旱不憂上下與足變而通之存乎其人非可以一切之法束縛而



篷窗隨錄卷九

六

馳驟之者也謹議

堅壁清野議

龔景瀚

竊惟邪匪滋事以來蔓延四省輾轉兩年負固則經年累月不能克奔竄則過都歷郡不能禦議者惟以兵少爲辭於是調隣省增新兵募鄉勇但謂以多爲貴不知其無益而反有害也何則

國朝經制之兵有限而腹裏尤少其重兵所在非番回錯雜之區則形勢要害之地也一調不已而至再三備禦空虛奸民因而肆志是無事之區又將滋事卽如四川湖北之兵皆以全赴苗疆邪教遂乘機起事豈非明效大驗乎此調兵之害也倉卒募兵但取充數非市井無賴之人則窮苦無聊之輩紀律不習技藝不精心志

不齊膽氣不壯遇賊惟有紛然鳥獸散耳此增兵之害也鄉勇守護鄉里易得其力若以從征則非所願無室家妻子田廬墳墓之足繫其心也平居未受涓滴之恩臨難責以身命之報於勢既有所難能而爲之長者素昔等夷本無上下之分與以虛名強相鈐制於心又有所不服故加恩則玩而驕執灋則忿而散求其約束而整齊之者難矣其藉此爲利浮開名數冒領銀糧者又無論也至於臨陣旣未習乎戰鬪又各自爲步趨疑則易驚紛則易亂卽或誘之以重利鼓之以大義而有勇無剛能暫而不能久閔然而進亦閔然而退耳此鄉勇之害也且兵勇多則糧餉廣糧餉廣則轉運難

國家帑藏充盈殺賊安民雖千萬所不計而民間之疲  
於輓輸困於差徭者不知凡幾矣文報有站糧運有臺  
軍營之移徙使節之往來其夫馬不能不資於民力近  
地不足調之遠處州縣雖官爲給價而例案所銷豈能  
敷用每縣夫數百名馬數十匹道途之費守候之費津  
貼之費司事者口食之費皆派之里下不肖生監又從  
而乾沒其中爲日旣久民力竭矣官吏但顧考成一切  
以軍興灋從事科斂督責民必不堪事變滋起或遇水  
旱之災何以處之况乎將領不能約束兵丁所過甚於  
盜賊鄉勇從而效尤激而生變是所憂者不獨在邪匪  
也然使有濟於事僥倖成萬一之功可也而自去年以

來其情形大概可見矣四省之山層崖峭壁削立如城  
砦者所在多有其上有田有水賊若據之非數萬之衆  
不能攻取然周圍百餘里或數十里終未能環而圍之  
也竭力仰攻士卒損傷過半幸而得之賊已乘間率衆  
他徙矣則又窮日夜之力以追之而其勢常不相及蓋  
賊因糧於民無地非民則無地非糧官兵之糧必須轉  
運賊竄無定向亦無定期糧臺豈能豫設夫馬豈能豫  
增倉卒移營糧必遲悞此一難也賊皆輕身登降便捷  
而我兵烏鎗弓箭火藥鉛彈身所佩帶不下二三十觔  
行走不易此二難也賊皆本土之人慣於山行婦人孺  
子亦趨捷若飛而我兵如陝甘等處壯健有餘輕捷不

足登山半日汗流氣喘未遇賊而先困矣此三難也賊隨時隨地可以休息而我兵行必接隊止必安營挖壕樹柵守卡站牆日夜不得安歇此四難也賊常飽而我兵常饑賊常逸而我兵常勞勝負之勢已分矣幸而勝之所殺者賊之後隊數十百人或其老弱疾病不能行者耳其首逆及全夥不可見也賊之詭計又分布數人於左右十餘里中四面放火使我兵疑畏不敢遽進及至探明而賊蹤已遠矣此尾追所以常不及也於是有所謂宜繞道前進迎頭截殺者然前後夾擊則左右分馳東西並攻則南北各竄山澗重疊道路分歧安所得十餘萬之兵一一迎而擊之卽令兵多將廣四面兜圍而

賊聚而衝我散而守十餘萬之兵分布於周圍數百里之內其勢既分其力亦薄賊以全力捨命衝突亦未有不潰而出者故賊之往來可以自如我之進退反不能自主賊合而我兵不得不分賊分而我兵遂不能復合焚掠裹脅賊愈殺而愈多疾病死亡兵日添而日少勦則無以爲守守則無以爲勦今日之賊無論非今日之兵所能藏事卽或額兵全來新兵已練而使之追逐千里之餘奔馳半月之久力疲氣阻其勢又爲今兵之續賊勢益張兵氣益餒日延一日事恐不可問矣然則爲今之計將柰何曰賊未至巴州而巴州之民先去賊未至通江而通江之城已空守土之官雖欲效死勿去其

誰與守此無他民心無所恃也故殺賊以安民也今必先安民然後能殺賊民志固則賊勢衰使之無所裹脅多一民卽少一賊矣民居奠則賊食絕使之無所擄掠民存一日之糧卽賊少一日之食矣爲今之計必行堅壁清野之瀟責成地方官巡行鄉邑曉諭居民團練壯丁建立堡砦使百姓自相保聚併小村入大村移平處就險處深溝高壘積穀繕兵移百姓所有積聚實於其中賊未至則力農貿易各安其生賊旣至則閉柵登陴相與爲守民有所恃而無恐自不至於逃亡別選精銳之兵二三千以牽制賊勢不與爭鋒但尾其後賊攻則救賊退則追使之進不得戰退無所食不過旬餘非潰



則死此不戰而屈人策之上者也其要必先選擇良吏  
一省之中賢而能者道府豈無數人牧令豈無二十餘  
人其奔走趨事明白勤幹者佐貳豈無數十人今川省  
賊所往來川東惟夔州達州川北惟保甯順慶而已陝  
西惟興安漢中商州河南惟南陽湖北惟荊州宜川施  
南襄陽鄖陽而已所屬牧令賢者畱之不肖者易之每  
處各派佐襍數人分任其事以一道府董局事佐以正  
佐數員講明利弊議定章程總其大綱其餘道府分路  
經理稽察不過三月可以畢事其次則相度形勢天成  
之險如大成砦太平砦者加卑因高使之可守移附近  
居民於其中先藏積穀貧者官貸其資茅屋草棚聽其

自便其故居仍畱勿毀賊未至時仍可如常安業也其  
村莊市鎮人煙輳集如臨江市普安場者隨其所居因  
山臨水爲築城堡外挖深壕務令高廣民居零星在外  
者移入之磚石木料匠役之費皆給於官惟丁夫取於  
民有貧乏者量給口糧以代賑恤其次則選擇頭人山  
上之砦平地之堡人戶旣多一切事宜需人經理擇其  
身家殷實品行端方明白曉事者或紳監或者民舉爲  
砦長堡長給以頂帶予以鈐記使總一砦一堡之事其  
親察戶口董視工程經管銀糧稽察出入訓練丁壯修  
飭守備別擇數人爲之副各就所長分任其事以專責  
成其次則清釐保甲戶口繁多莠良莫辨外至者虞其

爲間諜也卽久居者亦慮其有匪黨也行保甲之法十  
家聯保互出甘結始準移居匪類送官究治其蹤跡可  
疑尙無確據者別附冊尾聽其另居自便毋使溷入以  
滋後累其餘良民悉使團聚家有幾人大小幾口所操  
何業田土若干詳註冊內以備稽核其次則訓練壯丁  
每戶抽壯丁一人或二三人編爲部伍烏鎗刀矛各習  
一技官爲給價製備器械每一堡若擇營中千把或外  
委一員兵三四名使之勤加訓練有事則登陴守禦自  
保鄉里毋令出征惟本州縣有警或隣堡告急許以其  
半救援其次則積儲糧穀堡砦之中建倉數間富家囤  
戶有糧難以盡移者官給銀悉行收買入倉無者買於

隣近各鄉官兵經過卽以此糧供支賊至閉砦壯丁守  
陣按名給糧毋令家食其鰥寡孤獨貧乏殘疾及家稍  
充而實無糧者準其照冊分別賑借賊平之後卽爲本  
鄉社倉分儲常平一遇災歉亦可就近賑糶其次則籌  
度經費所有築堡挖壕建倉買糧置備軍械一切守禦  
器具及搭棚蓋屋之費銀皆官給交堡砦長司其出入  
惟倉穀之數主於官賑借供支官爲報銷其餘銀勻攤  
於堡砦居民所有田地分爲十年或八年隨地丁徵還  
如此者有十利焉川省無土著之民五方襍處其性輕  
於去就故一聞警報輒四散奔逃民心疑懼則千里無  
堅城矣今堡砦林立聲勢聯絡民居旣安民志自定父

母妻子一家團聚無流離死亡之憂並不慮爲賊逼陷  
陷於邪黨可以保全良民潛消賊勢其利一也糧皆藏  
於堡砦之內所餘村落店館皆空屋耳賊卽千里焚掠  
無所得食若攻圍堡砦則丁壯自護身家其守必力又  
有隣堡之救援官兵之策應其力必不能攻陷狂奔十  
日非潰而四散則輾轉於溝壑之內而已區區首惡何  
難就擒可以制奔竄之賊其利二也據險之賊不能不  
下山掠食今民皆團聚糧不露處冬春之交野無青草  
附近已無所掠遠出則近山之堡砦皆得邀而擊之其  
勢又不敢出坐困月餘積糧旣竭終亦歸於死亡逃散  
而已可以制資固之賊其利三也州縣之有鄉村如樹

之有枝葉枝葉傷則本根無所庇鄉村皆爲賊所蹂躪其城郭之不亡者僅矣今四面皆有堡砦障蔽擁護賊必不敢徑犯城郭有急則環而救之如手足之捍頭目賊將腹背受敵况官兵又乘其後乎可以保障州縣其利四也堡砦遠者相距數十里近者或十餘里官兵經過就近供支糧臺可以不設官無轉運之費民無輓輸之勞至文報往來尤關緊要堡砦之在大路者卽安設夫馬遞送無須兵勇護之可以省臺站之費其利五也每省挑選精兵三千賊合亦合賊分亦分牽制其後使之不得攻陷城堡足矣其餘悉令歸伍所省鹽糧猶其小者也兵少則差徭亦省民受無窮之利而營伍不至

空虛亦無虞再生他變其利六也守陴壯丁惟賊至時  
數日給以口糧耳無按月之鹽糧無安家之銀兩也其  
費較招募鄉勇所省何啻天淵而愛護鄉里朝夕相見  
猶有古者守望相助之意可以情法維繫之不若鄉勇  
從征日久習於兇暴怯公戰而喜殺掠釀爲將來無窮  
之隱憂其利七也保伍時相糾察而堡砦之長又從而  
稽之則奸宄無所容其桀驁不馴如嚙嚙者亦懾而不  
敢肆可以漸化爲良民其利八也邪教蔓延爲日旣久  
伏而未動者正不乏人今淑慝旣分居不相襍其冥頑  
者苟潛入於賊黨可以一并殲除其愧悔者必安居乎  
故業可以保全身命絕後患之萌開自新之路其利九

也規模既定守而勿失遠近一體上下同心如網之在  
綱有條不紊如身之使臂無令不從無事之時按籍而  
稽瞭如也有事之時畫地而守井如也一勞永逸數世  
賴之其利十也然而愚民可與樂成難以慮始因循日  
下畏難苟安此議一出必有阻之者矣一則曰騷擾反  
以累民也夫擇利莫若重擇害莫若輕賊匪所過焚燒  
房屋殺戮人民擄掠婦女其慘極矣民雖至愚亦必明  
於利害所全者大卽小有騷擾猶當毅然爲之况保其  
身家全其積聚順其情之所樂何累之有若云奉行不  
善則官吏之過當易其人不當廢其灋如戰場失利豈  
以偶無良將而遂永不用兵乎一則曰迂緩不切於事



也夫欲速則不達自去歲以來各省所行者何一不速  
何一有效事固有不急急於目前而收功於異日者及  
今爲之未爲晚也行之一縣可保一縣行之一府可保  
一府同時並舉不過三月賊在羅網之內矣是速莫速  
於此也舍此以圖其果有旦夕奏效操券而得之策乎  
一則慮其費大也夫成大事者不惜小費苟能平賊卽  
多費亦所不惜今州縣大者不過堡砦數十處小者十  
餘處一省所辦者不過三四十州縣耳裒多益寡合計  
每省不過用銀一百萬兩而已自是卽無所費較之養  
兵養鄉勇每月需銀百萬者其費何如且尙未有底止  
也况惟買糧爲費較巨而糧分儲於堡砦何異儲於州

縣之倉今各州縣豈能不採買乎其餘借項分年帶徵歸款是不獨省費且並無所費矣一則畏其繁難也夫天下無難成之事患無任事之人今自道府下至堡砦之長總理者有人分任者有人勞瘁不亂纖悉具舉何慮其繁難且通江巴州儀隴賊所蹂躪之處失業難民豈能不爲撫卹清察戶口修理房屋弔生卹死賑乏周貧其繁難何止十倍於此與其補救於已然之後何如豫備於未事之先願平心而熟計之也是數說者皆不足以及難之然則今日急務莫有先於此者矣安民卽所以殺賊民懼賊而逃猶可言也兵愈增則差徭愈重師愈久則擾累愈多數月之後恐民之見賊將不逃而合

之矣今不早爲後悔何及哉

附擬諭官紳士民告示

龔景瀚

爲遵

旨曉諭事照得敎匪不戢擾害生民現經各元戎統領  
大兵勦辦無難漸就殲除惟恐官兵追勦緊急賊  
匪窮極思逞四散狂奔陝甘南面一帶盡係高山  
路途紛襍村落零星官兵勢難一一代爲防護賊  
匪沿途覓食所過焚掠百姓多被殘害必須豫爲  
防範修築堡砦挖深溝壕同心協力可保身家賊  
至則併力守禦使之無可掠食官兵緊躡其後旬  
日之內賊必滅亡是既不受賊匪之害且可助官  
兵之勢保護閭閻最爲善策前奉

上諭朕聞從前湖北教匪竄迹季感時經過各處多被  
焚掠獨隨州一處未被賊擾推原其故因該處民人  
於賊匪未來之先豫行掘爲深溝堆疊土山賊旣不  
能偷越溝壕擾害村莊而該民人占據土山足資捍  
衛是村莊守禦旣嚴賊匪亦無由肆掠食物復有官  
兵追躡其後未有不窮蹙潰散者此亦保護村莊之  
良灋行之已有成效若川陝河南等省各處村堡俱  
能照此豫爲防範何至任賊恣意蹂躪乎著傳諭勒  
保松筠吳熊光等飭令所屬地方曉諭居民相度地  
形或可仿照辦理令鄉勇人等加意護防堅壁清野  
以期賊蹤斂戢不敢肆行侵擾於堵剿機宜自爲有

益欽此欽遵當經飭知各州縣遵照出示曉諭督率  
辦理在案惟恐奉行不善有名無實或急迫而反  
至騷擾累民或苟且而遂以顛預了事章程不具  
器械不全終難以資保障而收實效本部堂彙集  
衆議悉心講求擬就條款合行出示曉諭爲此示  
仰所屬官民紳士人等遵照後開各條實力妥爲  
辦理其有因時因地當畧爲變通者該地方官及  
紳士耆民相度情形斟酌損益總期百姓得相保  
聚不受擾害賊匪無可擄掠易於剿除以仰副

聖主除暴安民之至意各宜凜遵毋違

計開

一立砦須擇寬廣之地以壯聲勢也查每縣可以修砦地方至多不過一二十處若貪圖近便或二三百戶輒立一砦非惟地勢不能妥當且人少勢孤賊匪一至先已心怯終難固守須擇山頂寬平可容男婦萬餘或數千名者方可修築若限於地勢難容多人必須分紮亦當於就近連修數砦聲息相通彼此聯絡庶不爲賊所困

一修砦須極險峻以憑固守也查砦柵不險防守甚難徒恃人力亦多糜費須擇天險三面陡峻一面可通行人之處起一嘉祥砦名其三面再爲修削一分派大小首領以便約束也一砦之中除家無丁

男及殘廢老弱者概不挑選外其餘每戶計丁之多寡或一人或二三人編爲隊伍十名擇一小領百人擇一大領五百人擇一總領平時派撥妥當同砦長副長注明冊籍一本呈官一本存查止許防守本境並聽地方官調防本縣邊界不許調赴他邑俟有警信砦長傳知總領總領傳知大領大領傳知小領小領傳知各散戶迅速赴砦防守如有一戶不到事過送官訊究到砦之後砦長凡有指授亦須以次稟承以便各歸約束

一彼此認保以防奸匪濶入也查南山一帶居民土著最少誠恐戶口繁多砦長不能一一認識奸良



莫辨平時須令十家互相結保方準入砦如無熟識之人不許濶入凡入砦之人共若干戶某戶男丁若干女口若干注明冊籍一本呈官一本存查以備稽核

一蓋房屋以備棲止也查每砦多至萬人或數千人若無住室勢難露處須於砦牆之內畱空數丈以爲守禦之地且防賊匪拋擲火彈其餘或瓦房或草屋悉從其便各量其人數多寡以定房間幾間聽砦長指定地方自行搭蓋懸掛門牌書寫名姓並登記冊籍臨時認牌居住庶免爭執

一前面路之兩傍俱削成峭壁近砦門一三十步路

亦挖斷深二三丈寬丈餘無事安放板橋以通來往有事卽將木板抽撤砦根挑挖壕溝一二道務極深闊砦上週圍砌成堅厚石壘約高四尺許裏面墊高尺餘以便站立守陣

一砦上須有林木水泉以備樵汲也查砦中柴水兩項最爲緊要須砦上有林木可以砍伐爲柴上有水泉可供合砦食用者修築如該處地方並無林木水泉之山砦中平時當多積柴草每家備儲水之器約計柴水足敷數日之用方可無虞

一安設卡隘以備偵伺也砦堡之外緊要路口設立卡房安設壯健義勇數十名按日輪換可以詰奸

細而遠瞭望

一妥擇耆長以專責成也查每耆以千戶論男婦卽不下數千人若無統攝終同烏合須選一家道殷實品行端方明白曉事衆所信從之人或紳士或耆民充爲耆長官予鈐記使總一耆之事一切修築防守事件無論鉅細俱遵指畫其董視工程稽查出入訓練丁壯修飭守備經手鉛藥掌管冊籍以及臨時督催巡查諸務非耆長一人所能獨任每耆再公舉數人各就所長分任其事以爲副長諸事商明耆長辦理

一製辦火器木石以備轟擊也查臨陣火器爲先而

守砦則木石爲要每丁壯千名須備鳥鎗四百桿製造過山鳥鎗二三十桿或四五十桿上鑄某縣某砦字樣排列牆頭砦門多安數桿鉛藥赴官請領牆外緊繫滾木壘石兩三層並多積碎石以便擲擊

一隨時操練以期純熟也查鎗礮必須點放純熟方可得力而刀矛亦必隨時演習每月或二次或三次酌定日期砦長及各執事副長大小首領與編入壯丁俱赴砦所操練不遵者砦長卽行責處

一糧食不許畱儲故屋以絕賊食也賊匪所到之處必先搜掠糧食糧食盡般入砦賊不得糧不戰自

困砦長及副長等平時分督所屬人戶各將所有糧石酌畱數日食用餘俱運入砦中儲於自蓋房間之內食盡赴砦再取

一平時輪流守砦以昭慎重也賊匪未來自不便俱株守砦中以致廢時失業但砦上房屋糧石不可不畱人看守牆壘壕塹亦應隨時修砌須酌畱一二十人輪班代換砦長副長人等仍不時親往稽查

一臨時須鎮靜嚴肅以一心志也砦中男婦幼孩多至萬餘或數千名口一有賊信易涉張皇喧嘩啼哭徒亂人意以致守陣之人手忙腳亂或鎗礮木

石施放太早至得用之時反無可用若長等須嚴  
諭婦孺不許喧呼率同副長梭織巡查督令守陴  
之人執定器械毋許張皇俟賊匪逼近鎗礮可及  
之時施放鎗礮木石可及之時施放木石不可一  
時俱發俟賊匪攻撲一面施放一次再撲再放如  
此兩三次賊匪必不敢再撲矣

一守宜堅定勿墮賊匪奸計也賊匪遇險峻若柵難  
以攻克卽謊言假道或託詞借糧並矢誓不妄傷  
一人鄉民苦無深識輕信其說遂遭毒害若長須  
嚴諭合砦人等斷不可輕聽其言賊匪又有時故  
示單弱止用數百人攻撲卡砦我兵輕其人少出

砦追殺賊復故意奔逃遺棄馬匹衣服等項我兵利其財物跟迹追搶賊匪大隊翻從後面夾擊或竟搶入砦柵砦長須嚴約丁壯無論賊之多寡止許在砦轟擊不可出砦追趕賊匪遺棄什物不可貪利檢取違者砦長卽時責處

一防宜周密勿令賊匪乘間也賊匪或日間不能得手往往於四五更我兵疲倦之時或早霧朦朧之候暗劫卡倫砦長須嚴諭大小首領丁壯人等日間更番歇息夜間各執器械不得暫離派定所在不許任意盹睡牆內多掛號燈以備伺警另撥更夫數十名擊櫟鳴鑼砦長及副長等親身督率巡

警毋稍疎懈又賊匪詭詐多端或向一面攻撲我兵齊赴此面堵禦賊遂分從他面乘間而入該若長亦須嚴諭賊匪所攻一面一面下壯悉力堵禦其他三面下壯不得擅動庶不至顧此失彼

一多設偵探以便防範也查用兵之瀾探報爲第一要務每若須擇心地明白健步善走者數十人於賊匪未至之先梭織往來探聽虛實多寡以便戒備卽賊匪已過之後亦須探明賊蹤果已遠竄方可解嚴

一盤詰宜嚴以防假冒也查賊匪未至之前多扮行商僧道差役營兵或粧作文武員弁或假作難民



乞丐探視虛實或大隊不能得手業已繞過卡倫  
後假扮尾追官兵鄉勇混入砦柵或令我兵下砦  
論話往往中其奸計砦長等最宜防備如有此等  
人來砦務須盤問來歷須驗明切實憑據確係官  
兵鄉勇方可準其入砦

一小心火燭以防不虞也查砦內草房稠密人煙輻  
輳且鉛藥俱儲其中火燭一不小心即可延燒淨  
盡若係夜間更恐誤認賊人劫砦登時潰亂必至  
自相踐踏砦長須嚴諭在砦人等時刻畱意倘或  
漫不經心卽時責處

一平地村鎮亦應築堡一體防維也查南山一帶崇

山固多而平地村鎮市集亦復不少倘商客人等及附近居民於山巔造砦或有不便之處須於本村鎮週圍挑挖壕溝一二道務須深闊內築高厚圍牆其守禦之凜一如砦柵

一隨時獎賞以示鼓勵也查砦長爲一砦之領袖副長等亦皆勞力勞心如能辦理妥協各地方官卽行稟明酌賞五六品頂戴其總領大小首領丁壯人等如能認真出力著有勞績亦卽隨時稟請優獎以示鼓勵

平賊議

龔景瀚

平賊之策不過剿堵撫三者而已堅壁清野之法不戰而屈人策之最上者也然而工鉅費繁蹂躪之餘民之蓋藏既空生計復窘軍興日久官亦未有餘力及此需之歲月今日又急不能待也無已其惟分屯合擊之一策乎夫兵宜聚而不宜散貴精而不貴多今徵調半天下其數將十餘萬而經略參贊總督將軍所用僅二三千人合四省計之不過二萬其餘安歸乎賊股愈分而愈多路亦愈分而愈襍於是派提鎮參游率兵千餘或數百人以分剿分堵不計賊之多寡兵之足數剿捕否也究之所謂剿者隨賊奔走而已所謂堵者坐延歲月

而已兵力旣衰聲勢愈弱數年以來未淨一路是置兵於無用之地而虛糜糧餉也府廳州縣每處畱兵或百餘或數十勢孤力微故轉糧散餉常覺兵多臨陣出征又常患兵少其弊在於分是不可不合而聚之也疲病恇懦之兵不能爲利而反爲害矢石交加之下一人驚顧萬衆披靡卽有勇者亦無所施其力矣善用兵者惟在能忍我不退則彼必退機之先後不過須臾將率以時訓練使上下之情洽則休戚相關彼此之技均則臂指可使故兵將必相習而後兵可用今所調之兵不必領於原營之將數月而易人臨時而更換兵不識將將不識兵倉卒遇賊有委而去之耳近年陣亡之官甚多

陣亡之兵反少以此是不可不精於操練也精壯之兵皆歸大營分給諸將大半老弱多不過二千人少者千人其能戰者惟數百人耳何可責其成功且尤患者兵少而官多將軍提督副都統各數人總兵十數人盡予重兵焉有此額其供支百倍於官兵省一人即可養數百兵而有餘又一隊之兵僅二三百人而參游都守或多至七八員連翼之雞不能俱飛而本營至無一官以目兵而署都守以武舉而護參游兵備空虛營伍廢弛何不別而擇之汰老病而擢勇智其循分供職者均回本營訓練新兵以備更調此兩得之道也是將率不可不精選也統馭在將致死在兵今軍營告捷官之升擢

者一疏至數十人而兵之得官者千百無一二也一升之米一兩三錢之銀所得幾何所望者惟厚賞耳而今之經略參贊不名一錢安得賞不踰時爪牙無摧堅陷陣之士偵諜無深入效命之人賞濫報輕孰爲我用是犒賞不可不厚也今被賊者四省一省之大屬吏賢而才者豈無數十人大府大加甄別度人地之宜升調勿拘成例使之撫循民人慎固疆圉假以便宜寬其文灋每州縣視其緩急輕重予銀萬餘兩或數萬兩以暇儲米麥草豆雇騾馬整器械勸修堡砦團練鄉丁使自相保聚官爲巡行郊野諭曉大義其民皆有尊君親上之心敵愾從王之志以戰則克以守則固可以助將帥官

兵之所不及是牧守尤不可不擇也數者既具可以行  
吾之策矣以陝西一省言之經略參贊總督將軍各提  
鎮各州縣之兵及隨營鄉勇其數不下十萬汰其老弱  
疾病怯懦無能者罷歸原營可得精兵四萬人以爲戰  
兵又其次者可得二萬人以爲押運軍馱畱守營盤每  
一千把領兵百一參游都守領兵五百或三百卽爲所  
部兵將永不相離四萬精兵分爲八營每營五千人守  
兵以千人輔之經略參贊總督各領一營其餘以提鎮  
之有勇略者領之又於其中擇敢死之士數百人以爲  
親軍明白善步者數十人以爲偵探倍給鹽糧卽於汰  
歸四方之兵餉取之有餘分屯要地宜疏而不宜密宜

遠而不宜近如賊在終南山中則蓋屋五郎鎮安石泉  
洋縣畱壩鳳縣寶雞皆要地也相形勢扼險要四面分  
布聽賊之游衍於山中我自椎牛饗士休養撫循使我  
兵力足氣盛皆有勃然殺賊之心賊蹤在百餘里內兵  
力可及者星夜發兵風馳雷擊附近之營各有偵探不  
期而來或截其旁或邀其後州縣之鄉勇亦乘其敝則  
一舉可以成功或賊乘間移至甘肅四川近我營者邀  
而擊之遠則不堵不追亦移各營之兵徐行環布相機  
而動若賊分竄兩省則各分四營之兵環之若分竄數  
處則擇其重且急者環之以逸待勞令不得出我之範  
圍旬月之內可以蕺事矣以此爲勦卽以此爲堵勦堵



得宜而勝算既得投出者必多賊勢既窮悔過者亦衆  
不言撫而撫在其中是亦策之善者也否則分股而馳  
分地而守兵力日疲賊勢轉熾如前所云吾不知其所  
底矣